

RAISING THE WIND;

OR, RAISING THE WIND, &c.

HABBIE SIMPSON & HIS WIFE

BAITH DEAD.

AS ORIGINALLY WRITTEN AND SPOKEN

BY JOHN ANDREWS,

IN THE EXCHANGE ROOMS, MOSS STREET.

PAISLEY:

PRINTED BY CALDWELL AND SON, NEW STREET.

1842.

RAISING THE WIND, &c.

I pit nae doot but ye a' heard tell o' Habbie Simpson, the Piper o' Kilbarchan, bit I'm thinking that ye ever heard the story that I gaun to tell ye about him and his wife Janet. Weel, ye see, it sae happen'd, that Habbie, li' mony mae noo a days, was gayan fond o' a wrap drap o' the blue, and as the story gangs, sae w' his wife; so that it gayan aften happened, that when Habbie yoket the fuddle, Janet, she yoket it to. Noo it's an auld Scotch saying and a true ane, that when a caunel is lichtet at baith ends it sune burns dune—an' it was sae verified in the present case, for Habbie waukening ae mornin' after a hard fuddle, says to Janet, "Rise, woman, and see if ye can get me hauf a gill; for oh! my head is just likin' to split." "Hauf a gill!" qu' Janet, "whaur wad I get it, when there's no plack in a' the house? and as for takin' it on, ye ken that's clean o' the quastion; sae ye maun jist lie still and thole the best way ye can." "Oh Janet," cries Habbie again, "ye're no amiss; ye're scheming; is there nae way ava ye can think o' to raise the wun?" "I'll tell ye what I'll do," quo' Janet, "I'll awa to the Laird o' Johnston and I'll tell him that ye're dead, and as ye're his great favourite o' his, I'm sure I'll get something frae him, to help to bury ye." "Od, that 'ill o' grand, quo' Habbie."

So up gets Janet, and awa to the Laird's house; whau ringing the bell, the door was opened by the lady, wha seeing Janet sae pitifu' lukin', she says, "Keep us a' the day, is there ony thing wrang at hame, that ye hae come here sae sune in the morning?" "Wrang!" quo' Janet, (dicht-in' her een wi' the tail o' her apron,) "a's wrang thegither, my lady; isna oor Habbie deed?" "Habbie deed!" quo' the lady in surprise. "A weel a wat, is he," quo' Janet, "an' a sair trial it is to me, lady, for there no as muckle in the house this morning, as wad feed a sparrow; an' whaur to get ony thing I'm sure I dinna ken. Oh dear! Oh dear! that ever it should come to this o't." "Compose yersel', Janet," quo' the lady, "and come yer wa's ben, and we's see what can be done." Sae in gangs Janet wi' the lady, an' gets a basket wi' some biscuit and speerits, an' ither articles needfu' for sic an occasion; an' thanking the lady for her kindness, comes awa hame to Habbie fu' blythely, whan doon they sat; nor did they rise till they made an end to the contents o' the basket. Noo, as the auld sang sings, the mair ye drink, the drier ye turn, for they were nae muner dune, than Habbie says, "Losh, Janet, that was real guid; can ye no get some mair o't." "Na, na," quo' Janet, "I hae played ma part; it's your turn noo." "Oh, very weel," quo' Habbie, "if it's my turn noo, ye maun jist be deed next." "Od, I hae nae objections, quo' she, "sae awa ye gang, and let us see what ye can do." Weel, awa gangs Habbie, and meeting the Laird just coming hame frae a hunting party, he says, "This is a fine day, Laird." "A fine day

Habbie," quo' the Laird: hoo is a' wi' ye? are ye no coming up to play us a spring on the pipes this night?" "It wadna leuk vera weel, Laird, for me to be seen playing on the pipes at your house and my ain wife lying a corpse at hame." "What! is Janet deed?" quo' the Laird. "Atweel is she," quo' Habbie; "and I'm sure it couldna hae happent on a waur time, for there neither meat nor siller iu the house; and hoo to get her decently aneath the yird I'm sure I dinna ken." "Dinna vex yoursel' about that," quo' the Laird, (giving him some money) "that is a trifle for you, in the mean time, and come to the house by and by, and I shall see what can be done for you." Habbie thanked the Laird for his kindness, bade him good day, and cam' a hame, gayan weel pleast wi' what he had gotten, and sen's Janet oot wi' the bottle for mair whusky to carry on the spree. In the mean time, hae ye gangt the Laird, whaur the first thing that he heard, was, that Habbie Simpson was deed. "Na, na," quo' he, "it's no Habbie; it's ony Janet." "It's Habbie," quo' the Lady, "was Janet here this morning hersel', and telt me that, and didna she get awa some speerits and biscuits as she said there was naething in the house?" "And didna I meet Habbie, just as I was coming hame, when he telt me Janet was deed. Bit ye see how it is—they are at their auld tricks again. Bit come, we'll awa to Habbie's, and see what they are about." In the mean time, Habbie and Janet are fuddlin' awa in fine style, and laugh heartily at the way they had raised the wuvv when Janet cries, "Gude preserve us, Habbie."

what's to be dune noo : I declare if that's no the Laird and the Lady; and they are eomin' straught here." "I dinna ken," quo' Habbie, "what to do, unless we be baith deed." Sac in the bed they gaed; an' they were nae suner doon than the Laird and Lady cam' in, and seeing Habbie and Janet in the bed, he says, "Waes me, isna that an awfu' sicht to see; the man and the wife baith deed?—bit I wad gie five shillings this moment, for to ken which of the twa deet first." The words were nae suner oot o' his mouth, than up jumps Habbie, cryin' "It was me, Laird; noo gie me the five shillings." It is needless to add, that the Laird gave Habbie the money, and had many a hearty laugh, when he thought on the way which Habbie and his wife had taken to raise the wind.

[Faint, illegible text, likely bleed-through from the reverse side of the page.]

Or hae ye taen him to your hame,
 To mak' claes for yersel' or wean?
 An' bottle by his side has lain,
 O' reemin' nappy,
 That Jamie ilka noo and then
 Micht tak' a drappy?

For Jamie weel could use the thumle,
 An' was wi' needle aye fu' nimle,
 An' ne'er about the price wad grumle
 O' ony job;
 But aft wad drink until he'd tumle
 Clean aff the broad.

But noo, alas! puir Jamie's gane,
 Like mony mae, to his lang hame;
 An' in the cauld kirk yard is lain
 Past a' remeid,
 Nae mair for to return again,
 Sin' he is dead.

Nae mair about the corse ye'll see him,
 Nae mair a bawbee will ye gie him,
 Nae mair his hat he'll gar flee frae him
 Upon the street,
 An' cry, Noo Jamie Gemmell gie them
 The tailor's leap.

But noo I maun lay down my pen,
 An' to my verses mak' an en',
 Whaure'er he's gaen weel may he fen,
 An' let ilk chiel
 Unto this prayer say amen.
 Sae fare ye weel.

EPITAPH.

Here in this kirk-yard
 There lieth interr'd
 The body of wee Jamie Gemmell,
 Who on earth was aye frisky
 Wi' drinkin' o' whisky;
 An' wi' needle an' thread
 Was fu' nimble.

But ae day, alas!
 When takin' a glass,
 Death cam, and awa
 Wi' him jumpet.
 An' noo here he lies,
 Till the dead shall arise,
 At the soun' o' the
 Archangel's trumpet.

1822